

I. DISPOSICIÓNS XERAIS

CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA

Decreto 206/2010, do 23 de decembro, polo que se modifica o Decreto 83/2009, do 21 de abril, polo que se fixa a estrutura orgánica dos departamentos da Xunta de Galicia.

O artigo 7º alínea a) do Decreto 83/2009, do 21 de abril, establece a estrutura e denominación dos órganos superiores da Consellería de Cultura e Turismo, entre os cales se encontra a Dirección Xeral de Promoción e Difusión da Cultura.

Co obxecto de adaptar a denominación do citado órgano superior á importancia crecente do sector do libro, despois da celebración do Ano do Libro e da Lectura de Galicia, considérase conveniente facer o correspondente cambio na denominación do centro directivo competente en materia do libro e bibliotecas.

Na súa virtude, e segundo o disposto no artigo 4º.15 da Lei 1/1983, do 22 de febreiro, de normas reguladoras da Xunta e da súa Presidencia, por iniciativa do conselleiro de Cultura e Turismo, por proposta do conselleiro de Presidencia, Administracións Públicas e Xustiza, e logo da deliberación do Consello da Xunta de Galicia na súa reunión do día vinte e tres de decembro de dous mil dez,

DISPOÑO:

Artigo único.-Modificación do artigo 7º do Decreto 83/2009, do 21 de abril, polo que se fixa a estrutura orgánica dos departamentos da Xunta de Galicia.

Modifícase o artigo 7º do Decreto 83/2009, do 21 de abril, polo que se fixa a estrutura orgánica dos departamentos da Xunta de Galicia, que queda redactado como segue:

«Artigo 7º

a) A Consellería de Cultura e Turismo estrutúrase nos seguintes órganos superiores:

1. Secretaría Xeral.
2. Secretaría Xeral para o Turismo.
3. Dirección Xeral do Patrimonio Cultural.
4. Dirección Xeral do Libro, Bibliotecas e Arquivos.

b) Queda adscrita a esta consellería a axencia pública Axencia Galega das Industrias Culturais».

Disposición adicional

As alusións contidas en normas de igual ou inferior rango á Dirección Xeral de Promoción e Difusión da Cultura entenderanse realizadas no sucesivo á Dirección Xeral do Libro, Bibliotecas e Arquivos.

Disposición transitoria

As unidades administrativas dependentes dos centros directivos afectados polo disposto neste decreto manterán a súa estrutura e funcións ata que se proceda ao desenvolvemento da estrutura orgánica da consellería.

Disposición derradeira

Este decreto entrará en vigor o mesmo día da súa publicación no *Diario Oficial de Galicia*.

Santiago de Compostela, vinte e tres de decembro de dous mil dez.

Alberto Núñez Feijóo
Presidente

Alfonso Rueda Valenzuela
Conselleiro de Presidencia, Administracións
Públicas e Xustiza

CONSELLERÍA DE CULTURA E TURISMO

Decreto 207/2010, do 10 de decembro, polo que se crea o Arquivo de Galicia.

O artigo 27º.18 do Estatuto de autonomía de Galicia establece a competencia exclusiva da comunidade autónoma en materia de arquivos de interese e que non sexan de titularidade estatal. A Lei 8/1995, do 30 de outubro, do patrimonio cultural de Galicia, concibe a existencia do sistema de arquivos de Galicia como a necesaria estrutura administrativa para organizar, xerarquizar e facilitar o cumprimento dos fins que os arquivos teñen encomendados e o patrimonio documental de Galicia demanda. No seu artigo 78º, esta lei sinala que o sistema se configura como o conxunto de órganos, centros e servizos encargados da protección, custodia, enriquecemento, comunicación e difusión do patrimonio documental de Galicia.

O Decreto 307/1989, do 23 de novembro, polo que se establece o sistema de arquivos e o patrimonio documental de Galicia, sinala no seu artigo 21º que o Arquivo Xeral da Administración de Galicia se creará mediante a oportuna disposición legal na cal se recollerán as funcións, competencias, situación e medios persoais e materiais.

Na actualidade, existe adscrita á Dirección Xeral do Patrimonio Cultural da Consellería de Cultura e Turismo unha unidade administrativa, con categoría

de sección e carácter de arquivo intermedio, denominada Arquivo Xeral da Administración, que vén exercendo funcións de recepción e tratamento documental da documentación producida e acumulada polas consellerías e outros órganos dependentes da Xunta de Galicia.

Unha parte da documentación acumulada no Arquivo Xeral da Administración, e os fondos que se conservan en locais xestionados polas distintas consellerías e outros órganos administrativos, ten adquirido xa, transcorridos vinte e oito anos desde a creación da Xunta de Galicia, carácter histórico. Por isto, debe ser transferida a un arquivo de carácter histórico.

Pero entre a voluminosa masa de documentos producidos e acumulados pola Administración de Galicia neses case trinta anos, existen outros moitos expedientes que deben ser eliminados, unha vez acadada a súa caducidade administrativa, pois a súa conservación indefinida orixina un gasto de difícil xustificación e dificulta a xestión e conservación das series documentais que posúen valor permanente.

Identificar e valorar con criterios científicos os documentos producidos pola Administración para determinar aqueles que merecen conservarse de forma indefinida por formaren parte do patrimonio documental é unha das misións que atinxen o sistema de arquivos.

No seo do sistema, é necesario que exista un arquivo que culmine a súa organización e reciba aqueles documentos que teñan carácter histórico procedentes dos restantes arquivos -administrativos e intermedios- do sistema, unha vez identificados, valorados e seleccionados. Un centro que reúna as adecuadas condicións construtivas e funcionais para asegurar a súa conservación, tratamento e posta á disposición dos cidadáns e da Administración, e que ao tempo posúa a necesaria dignidade arquitectónica para transmitir adecuadamente a relevancia da súa función.

A creación do Arquivo de Galicia, no cal se integrará o denominado Arquivo Xeral da Administración de Galicia, responde a esta finalidade.

Pero, ademais de cumprir esta misión de racionalización documental imprescindible, o Arquivo de Galicia está chamado a representar a unidade do patrimonio documental de Galicia. Un patrimonio notable caracterizado pola súa antigüidade, diversidade de orixe, dispersión espacial e invisibilidade. A creación deste centro especializado permitirá difundir a súa existencia e darlles a visibilidade que merecen a uns bens ligados á existencia mesma da cultura de Galicia.

Na súa virtude, por proposta do conselleiro de Cultura e Turismo, e logo de deliberación do Consello

da Xunta de Galicia, na súa reunión do día dez de decembro de dous mil dez,

DISPOÑO:

Artigo 1º.-*Creación.*

Créase o Arquivo de Galicia como cabeceira e centro de referencia do Sistema de Arquivos de Galicia, con carácter intermedio e histórico, adscrito á consellería competente en materia de cultura a través do centro directivo competente en materia de patrimonio documental, como unidade administrativa sen personalidade xurídica.

Para os efectos deste decreto, enténdese por arquivo intermedio o arquivo de carácter público que ten como funcións fundamentais as de recibir toda a documentación depositada nos arquivos centrais unha vez que esta acadou unha determinada antigüidade ou cando a súa consulta por parte dos organismos produtores é esporádica; identificar, valorar e seleccionar os documentos susceptibles de seren conservados definitivamente, en función do seu valor administrativo, legal ou histórico, despois de transcorrido o prazo de validez administrativa; e transferir os documentos así seleccionados a un arquivo histórico para a súa conservación definitiva con fins de estudo, investigación e difusión xeral. E enténdese por arquivo histórico o arquivo de carácter público que recibe, para a súa conservación permanente, tanto os documentos que lle transfere un arquivo intermedio, unha vez seleccionados, como os doutras procedencias por calquera outro título que se acorde depositar nel.

Artigo 2º.-*Funcións.*

Son funcións do Arquivo de Galicia as seguintes:

a) Recibir os documentos procedentes dos diferentes órganos da Xunta de Galicia ou das entidades públicas dependentes dela cun ámbito territorial superior a unha provincia.

b) Recibir os documentos procedentes de organismos, institucións e entidades públicas de ámbito autonómico dependentes da Xunta de Galicia que fosen suprimidos, con independencia da súa antigüidade, e calquera outro fondo de carácter público ou privado de interese xeral para a comunidade autónoma que se acorde depositar nel.

c) Programar, coordinar e dirixir a identificación, valoración e selección documental de todos os arquivos do subsistema de arquivos da Xunta de Galicia.

d) Organizar e describir os fondos documentais que custodie.

e) Conservar os fondos documentais que custodie.

f) Coordinar os programas de reprodución con fins de conservación de fondos do patrimonio documental de Galicia.

g) Facilitar o acceso aos documentos que custodie e á información contida neles nos termos que establece a lexislación.

h) Difundir por calquera medio os fondos documentais que custodie e, en xeral, o patrimonio documental de Galicia.

i) Establecer e desenvolver normas técnicas arquitectónicas para o Sistema de Arquivos de Galicia.

j) En xeral, calquera outra función que lle sexa encomendada por razón da súa competencia.

Artigo 3º.-*Sede.*

O Arquivo de Galicia terá a súa sede na cidade de Santiago de Compostela.

Artigo 4º.-*Estrutura e funcionamento.*

1. O Arquivo de Galicia estrutúrase en dúas áreas de carácter transversal, nas cales se integran as súas funcións como arquivo intermedio e histórico: área de xestión documental e área de comunicación e difusión.

2. A área de xestión documental agrupará as seguintes funcións:

- a) A recepción de fondos documentais.
- b) A identificación, valoración e selección de fondos documentais.
- c) A organización e descripción de fondos documentais.
- d) A conservación de fondos documentais do Arquivo de Galicia e a coordinación da reprodución con fins de conservación do patrimonio documental de Galicia.

3. A área de comunicación e difusión agrupará as seguintes funcións:

- a) A comunicación dos fondos documentais facilitando o acceso aos documentos e á información contida neles.
- b) A difusión por calquera medio dos fondos documentais do Arquivo de Galicia e o patrimonio documental de Galicia.
- c) O establecemento e desenvolvemento de normas técnicas de carácter arquivístico para o Sistema de Arquivos de Galicia.

4. Os arquivos centrais das consellerías da Xunta de Galicia dependerán funcionalmente do Arquivo de Galicia.

Artigo 5º.-*Medios persoais e materiais.*

Adscribíense ao Arquivo de Galicia os medios persoais e materiais do Arquivo Xeral da Administración da Xunta de Galicia e do Servizo do Subsistema de Arquivos de Galicia.

Disposicións derradeiras

Primeira.-Facúltase o conselleiro de Cultura e Turismo para ditar as disposicións necesarias en cumprimento e desenvolvemento deste decreto.

Segunda.-Este decreto entrará en vigor o día seguinte ao da súa publicación no *Diario Oficial de Galicia*.

Vigo, dez de decembro de dous mil dez.

Alberto Núñez Feijóo
Presidente

Roberto Varela Fariña
Conselleiro de Cultura e Turismo

Decreto 208/2010, do 16 de decembro, polo que se establece a denominación do Centro Superior Bibliográfico de Galicia como Biblioteca de Galicia (Centro Superior Bibliográfico de Galicia).

A Lei 14/1989, do 11 de outubro, de bibliotecas, creou o Centro Superior Bibliográfico, centro bibliotecario fixo, cabeceira da Rede de Bibliotecas de Galicia, e núcleo central de información bibliográfica, de automatización, de normalización dos procesos técnicos, dos plans para a catalogación centralizada ou compartida, e de información, asesoría e formación profesional.

Desde a posta en funcionamento da Cidade da Cultura de Galicia a sede do Centro Superior Bibliográfico de Galicia será o edificio da Biblioteca de Galicia. Coa finalidade de evitar confusión sobre o nome do centro e o da súa sede, considérase conveniente que a denominación sexa a de Biblioteca de Galicia-Centro Superior Bibliográfico de Galicia.

Na súa virtude, por proposta do conselleiro de Cultura e Turismo e logo de deliberación do Consello da Xunta de Galicia, na súa reunión do día dezaseis de decembro de dous mil dez,

DISPOÑO:

Artigo único.-O Centro Superior Bibliográfico de Galicia, creado pola Lei 14/1989, do 11 de outubro, de bibliotecas, pasa a denominarse Biblioteca de Galicia (Centro Superior Bibliográfico de Galicia).

Disposicións derradeiras

Primeira.-Facúltase o conselleiro de Cultura e Turismo para ditar as disposicións necesarias en cumprimento e desenvolvemento deste decreto.